

四庫全書

史部

欽定四庫全書

平定準噶爾方略前編卷十八

雍正六年冬十一月甲子

申定預備軍需尅扣之禁有叅員短發累民者  
准先行動帑給之

上諭兵部曰向來預備軍需如採買驟馬製辦物件之  
類不肖有司往往虛耗國帑派累民間種種弊端朕  
知之甚悉已降旨屢行申飭禁止而此風尚未全改

朕愛養斯民不使絲毫擾累凡軍務所需悉動帑金照時價購辦又恐承辦官員預留將來核減之地稍借民力以助公事特令岳鍾琪等核定折中價值倘時價可減即為節省或定價不敷據實奏加此皆體恤官員撫綏黎庶之至意也倘嗣後承辦各員再有尅扣短發侵蝕等弊其罪誠不可逭若叅革之後必俟審擬定案方行著追則百姓守候補領之價必致累月經年而不能得深可軫念嗣後一經題叅摘印

即照數核明尅扣之價先動軍需銀兩傳集百姓如數找給仍將該員於本境枷號勒限追完如逾限不完嚴加治罪庶貪墨之人知所做懼而軍需有益民無擾累矣

已已

辦理藏務吏部尚書查郎阿疏奏西藏善後事宜

查郎阿等遵

旨覆奏言進藏兵丁陝西八千人除穆魯烏蘓之東蒿  
沁察罕哈達留兵二千坐站兵千八十人現至  
藏者四千九百二十四四川四千人除黎烏蘇留  
兵二千坐站兵五百現至藏者一千五百雲南  
三千人二千留魯隆宗一千留察木多臣等謹  
遵

旨選陝西兵一千名四川兵一千名隸駐劄西藏大臣  
邁祿周瑛等並酌留二省遊擊以下率領駐劄

以備調遣藏事方定達賴喇嘛移居里塘於二  
十三日自藏啟行所撤兵丁分五隊副將惠延  
祖率寧夏兵一千五十名為第一隊臣查郎阿  
馬拉率西安滿洲兵四百名固原兵五百名四  
川兵一百名達賴喇嘛即在臣隊中令副將楊  
大力率四川兵四百名防護前行為第二隊叅  
將王有循率督標兵四百九十名涼州兵二百  
三十名為第三隊守備戴義雄潘世喜率固原

兵七百五十名為第四隊總兵官周開捷率西  
寧兵八百名為第五隊其雲南總兵官南天祥  
原領兵一千名仍暫令駐劄察木多以便應援  
奉入報

聞

十二月辛巳

振武將軍宗室公巴賽疏報鄂爾昆濟爾瑪台  
圖拉等處屯田收穫青稞麥糜凡二千八百四

十石有奇奏入得

旨下部知之

丁亥

命頗羅鼐暫管前藏事務

吏部尚書查郎阿等奏言頗羅鼐為唐古忒衆  
所信服已遵

旨令其管理後藏直至岡底斯阿里等處其前藏事務  
舊設噶卜倫管理據頗羅鼐薦二人一名色朱



特塞卜騰一名策凌旺扎爾臣訪察二人並大臣之子誠實可用但招地初定新授二噶卜倫管理諸事恐衆情未能允協今頗羅鼐既為衆所素服而前藏後藏相距不遠臣等請暫令頗羅鼐兼管前藏事務俟達賴喇嘛移居既定招地兵撤後仍令頗羅鼐專管後藏議政王大臣等議覆悉如所請奏入

上從之

士辰

命四川重慶總兵官任國榮暫駐里塘

上諭兵部曰達賴喇嘛自藏起程明年二月初可至里塘此地原有喇嘛寺院可以居住著四川重慶總兵官任國榮帶領進藏兵丁二千名前赴里塘暫駐防護弁兵等天寒路遠効力勤勞應加賞賚以示軫念達賴喇嘛初至里塘其應支供給預為辦理重慶總兵印務著岳鍾琪委員署理

丁酉

命封頗羅鼐為貝子

上諭內閣曰從前西藏用兵之時頗羅鼐甚為効力蒙  
聖祖仁皇帝授為扎薩克台吉上年西藏噶卜倫等因  
嫉妬爭權彼此不睦阿爾布巴隆布鼐扎爾鼐暗結  
匪類公然肆惡將朝廷敕封貝子總理事務之康濟  
鼐擅行殺害併欲害及頗羅鼐頗羅鼐受其逼迫領  
兵為康濟鼐復讐將逆黨罪狀奏聞是以朕特遣大

臣等領兵前往究問情由以便分別治罪頗羅稟聞  
大兵將至率衆奮勇前驅直抵藏地阿爾布巴等力  
屈勢窮被各寺喇嘛等拘執獻出欵差大臣到彼一  
一究問盡得其悖逆妄亂之情已將阿爾布巴等及  
逆黨正法西藏殲此渠魁黃教可興番衆可輯頗羅  
稟深知大義討逆鋤姦俾無辜受害者得雪沈寃背  
旨肆行者早正刑辟甚屬可嘉著封為貝子以獎義  
勇以昭國憲

戊戌

命駐防哈密官兵歲於五月往代

上諭兵部曰哈密駐防官兵每年輪換定期於十二月  
內派往朕思臘月天寒草枯水凍官兵跋涉為難查  
從前甘肅官兵駐防哈密有五月內更換之例今乃  
著於五月內派往

雍正七年春二月戊寅

命吏部尚書查郎阿協辦陝西軍需事務

癸巳

定議進勦噶爾丹策零

上諭諸王內閣九卿八旗大臣等曰準噶爾一部落原係元朝之臣僕其始祖曰額森額森之子托琿漸至大員因擾亂元之宗族離間蒙古恐獲重罪遂背負元朝之恩逃匿於西北邊遠之處元末又煽誘匪類結成黨與遂自稱準噶爾肆行劫擄迨至我朝有噶爾丹策妄阿喇布坦二人世濟其惡擾害生靈滅棄

釋教造孽多端不可枚舉當我朝定鼎之初各處蒙古傾心歸順共輸誠悃請安納貢求為屬國安享太平樂利之福八十餘年惟準噶爾一部落遁居西北五千里之外擾亂離間衆蒙古肆行劫奪噶爾丹身為喇嘛不守清窺不遵佛教破戒還俗娶青海鄂齊爾圖車臣汗之女為妻後又潛往青海賊害伊之妻父鄂齊爾圖車臣汗擄其屬下人衆續因喀爾喀七旗內彼此稍有嫌隙奏懇

聖祖仁皇帝為之和解因遣大臣同達賴喇嘛使者前  
往噶爾丹遣人暗探消息遂以喀爾喀等卑視達賴  
喇嘛使人為辭遣伊族內微末台吉多爾濟扎卜將  
喀爾喀汗台吉等肆行凌辱喀爾喀汗等怒彼狂悖  
無禮會衆將彼殺害噶爾丹遂稱殺害伊弟多爾濟  
扎卜與喀爾喀構隙掩其不備發兵猝擊喀爾喀衆  
潰紛紛來投

聖祖仁皇帝深為軫念施恩育養遣使往噶爾丹處諭



以兵為凶器令其與喀爾喀和好多方開導詎噶爾丹冥頑不靈借追襲喀爾喀之名入犯邊汛彼時即行勦滅復有何難我

聖祖仁皇帝好生為德遣使責問噶爾丹惶愧恐懼設誓撤兵乃並不歸伊住牧之所仍潛居克爾倫圖拉地方暗行窺伺

聖祖仁皇帝復遣使降旨諭以應回原住牧地方噶爾丹佯稱遵奉諭旨仍乘隙潛掠沿邊蒙古之畜牧衆

蒙古不獲安居我

皇考遂上告

天地親統大兵聲罪致討葛爾丹輒敢逆天與我西路  
大兵接戰伊軍大敗妻子被擒噶爾丹窘迫自殺彼  
時大兵即應直搗巢穴收其部落我

聖祖仁皇帝恐天下後世有窮兵黷武之議因而中止  
策妄阿喇布坦者噶爾丹之姪也與伊叔噶爾丹不  
相和睦帶領七人潛逃至吐魯番地方居住

聖祖仁皇帝以策妄阿喇布坦向與伊叔不睦懼其誅害遁跡逃生加以恩澤伊當感戴歸誠且

聖心仁慈不忍遣兵將噶爾丹餘剩部落悉行勦滅恩加格外遣使賞給策妄阿喇布坦彼時策妄阿喇布坦力弱勢微甚為恭順其後離間伊之妻父土爾扈特之阿玉奇汗與其子三濟扎卜誘三濟扎卜攜帶萬餘戶至伊住牧之處因而強佔入已從此遂不安分肆意妄行窺伺青海擾害生靈率領賊兵前進被

哈密駐防輕兵擊敗遁回策妄阿喇布坦又假黃教  
為名潛兵入藏無故殺伊妻弟拉藏汗毀壞寺廟殺  
害喇嘛搶掠供器是以特遣大臣前往詢問乃伊慙  
不畏死阻兵抗命使臣率師甚少兵力單弱伊得以  
愈肆猖狂

聖祖仁皇帝仍賜包容諭令邊外兩路大兵緩進屢次  
遣使示以

聖意謂策妄阿喇布坦果其悔過懇恩具奏其時另降

諭旨若仍怙惡不悛然後將此部落人衆悉行勦滅  
此我

聖祖仁皇帝之本意也朕紹登大寶策妄阿喇布坦雖  
遣使求和朕知非伊本懷諭伊來使云爾歸告知爾  
台吉朕纘承我

皇考大統爾台吉若欲受我

皇考天恩須盡改前非遵朕諭旨定界安居若欲犯我  
皇考天威任爾備兵前來定當加以天討如此降旨分

晰利害遣使前去又恐策妄阿喇布坦心懷疑貳將  
兩路大兵盡行撤回乃伊因此愈生驕傲於定界一  
事妄欲侵佔界地朕又向伊來使降旨云爾告知策  
妄阿喇布坦定界一事實於伊身有益如遵奉諭旨  
即遣使具奏若不遵諭旨亦必遣使前來乃伊並不  
回奏此際策妄阿喇布坦身故伊之長子噶爾丹策  
零遣使前來奏聞伊父身故之事稱伊父已經成佛  
又稱欲使衆生樂業黃教振興等語噶爾丹策零不

過邊遠部落一微末台吉耳使衆生樂業黃教振興  
豈伊應出之語耶况伊果欲求和應代伊父謝罪懇  
恩送回青海叛送潛逃之羅卜藏丹津以贖前愆乃  
並不輸誠向化敢以如許妄誕之詞見之陳奏此特  
欲倣倣伊父之故轍耳聞噶爾丹策零甚屬凶暴且  
西藏阿爾布巴隆布鼐扎爾鼐等濟惡同謀將實心  
為國効力之貝子康濟鼐殺害此等叛逆罪狀皆因  
準噶爾與伊處相近而逃去之羅卜藏丹津原係伊

等姻戚彼此相依是以敢於恃逆迨其窘迫倉猝之時則必投奔準噶爾亦屬顯然因頗羅鼐奮勇直前截其去路阿爾布巴等未得前進即被擒獲準噶爾性好搶掠若留在衆蒙古遊牧地方將來必受其害今朕已將來使遣回若伊諸事俱遵旨陳奏臨時朕另行裁奪降旨倘仍前推諉矜張肆恣負朕屢次遣使開導指示之仁恩抗玩不恭將來噶爾丹策零斷非安分守法之人必至生事妄為况西北兩路大兵



盡已撤回此際伊等如或生事則我朝如許安享太平之喀爾喀等及辦理安插妥貼之青海西藏必至被其擾害甚屬可慮且事乃

聖祖皇考注意未完之事仰賴

上天眷佑

聖祖皇考福澤國帑充裕官員弁兵同心奮勇願為國家効力實係可以舉行之會若遲疑不決定貽後悔夫用兵者國家不得已之事也窮兵黷武為聖帝明

王之所深戒而以大加小以強陵弱又仁人君子之所恥而不為者况準噶爾彈丸之地又在極北之區得其土不足以耕耘得其民不足以驅使即使減此朝食亦不足以誇耀武功此皆朕所熟思而詳審者也但留此餘孽不行剪除實為眾蒙古之巨害且恐為國家之隱憂今天時人事機緣輻輳時不可遲機不可緩天與不取古訓昭然且我

聖祖皇考為此籌畫多年未竟其事茲當可為之時朕

不敢推諉亦不忍推諉此朕一人之見也用兵大事所關甚重不可輕率著諸王議政大臣九卿八旗大臣各抒己見公同詳確密議具奏尋議曰準噶爾部落自噶爾丹逞凶悖逆及策妄阿喇布坦復肆驕悍並伏冥誅今噶爾丹策零踵惡不悛若留此餘孽則喀爾喀青海西藏等處必被擾亂伏乞

皇上命將興師大彰天討以永除蒙古部人之害奏入

得

旨諸王滿漢文武大臣等衆議僉同一切應行事宜著  
即辦理

三月庚戌

命副都統銜察哈爾總管馬爾薩赴軍前

上諭王大臣等曰護軍統領塔拉圖朕聞在軍前每日  
醉飲大負委任著革職來京其員缺令副都統銜察  
哈爾總管馬爾薩前去

壬子

命川陝總督岳鍾琪補給駐防哈密甘肅提標兵歷年  
應領鹽菜行糧銀五萬二千八百兩

丙辰

命領侍衛內大臣三等公傅爾丹為靖邊大將軍北路  
出師川陝總督三等公岳鍾琪為寧遠大將軍  
西路出師討準噶爾噶爾丹策零

辛酉

定議北路出兵事宜

議政王大臣等遵

旨議奏曰北路出征事宜一統兵將士應請撥定京城  
八旗兵六千名自總統將軍外應遣副將軍叅  
贊大臣前鋒統領及營總叅領侍衛章京前鋒  
校護軍校驍騎校等率之車騎營兵九千名應  
撥總兵官副將叅將遊擊守備千總把總等率  
之其押運糧餉大臣隨印學士及中書司官筆

帖式等並請

命往奉天吉林察哈爾索倫土默特右衛寧夏七處兵  
八千名應撥統領及管轄者往喀喇沁土默特  
兵八百名應撥塔布囊等率之一官兵啟行分  
路定期北路官兵遠駐阿爾台今京城八旗兵  
於五六月間分五路進出口後與察哈爾土默  
特兵同行車騎營兵分六路進與奉天吉林索  
倫右衛寧夏兵並六月啟行至駐劄處與大兵

合一北路出兵計總統將軍一員副將軍一員  
叅贊大臣六員前鋒統領一員副都統十員總  
兵官二員營總二十四員叅領副叅領共四十  
一員雲麾使一員副將四員章京一百三十六  
員中書二員司官十三員侍衛十二員叅將遊  
擊共八員前鋒校十七員護軍校一百八十一  
員驍騎校一百二十九員筆帖式四十三員守  
備十六員千總把總共九十六員統計官七百



五十三員除奉

旨賞賚外凡馬駝器械及跟隨口糧鹽菜銀並與兵丁

糧餉遵

旨寬裕支給奏入得

旨振武將軍公巴賽著為副將軍振武將軍印務著順  
承郡王錫保管理鑲黃旗滿洲都統侯陳泰右翼前  
鋒統領袞泰鑲白旗漢軍都統石禮哈正白旗滿洲  
副都統戴豪散秩大臣公達福正藍旗滿洲副都統

覺羅海蘭俱為叅贊大臣原任右翼前鋒統領丁壽  
以都統銜為軍營前鋒統領直隸正定總兵官魏麟  
河南河北總兵官閃文繡統領車騎營兵奉天副都  
統納秦統領奉天兵白都納副都統塔爾岱副都統  
銜西彌賴統領索倫兵白都納副都統費雅思哈統  
領寧古塔兵右衛副都統阿三統領右衛兵寧夏副  
都統蘇圖統領寧夏兵鑲藍旗蒙古副都統承保鑲  
白旗滿洲副都統常祿統領察哈爾兵歸化城副都

統馬爾齊袞布統領土默特兵塔布囊丹巴沙津達  
賴等統領喀喇沁土默特兵糧餉事務派法敏伊都  
立巴泰西琳傅德等管理盛京禮部侍郎永國兼內  
閣學士銜隨靖邊大將軍印前往北路軍營其辦理  
各疑俱詳細妥協悉依議行

乙丑

命以兵丁借支出口銀為恩賞

川陝總督岳鍾琪疏言河州營兵出口巡緝時

值隆冬借給整裝銀五千二百兩今事訖應於  
應領餉中扣還奏入得

旨兵丁借支出口銀兩著即作為恩賞免其扣還

庚午

議開長安縣子午谷及增設各隘口官兵

川陝總督岳鍾琪疏言秦省自南山通蜀道有  
長安之子午谷蓋屋之黑水谷郿之斜谷三谷  
中黑水與斜谷極險僻難開惟子午谷在漢唐

時為通運大道後漸荒廢若更鑿此路令坦夷  
由西安徑抵漢江纔五百餘里最便似宜設兵  
防守以便行人請於子午谷中秦嶺南五郎關  
設守備一員千總二員駐兵二百五十名秦嶺  
北關神里亦屬隘口請即五郎關所設營中撥  
千總一員兵五十名分駐其地其黑水谷中柳  
葉河應增設把總一員兵五十名再移鳳翔城  
守營兵駐郿縣專守斜谷兼防桃川虢川等處

號川應增設巡檢千總各一員兵一百名戶部  
遵

旨議覆並應如所請奏入

上從之

夏四月丙子

命選西安滿洲兵暫駐涼州及增太原城守兵

上諭內閣曰川陝總督岳鍾琪統領大兵出口進勦之  
後甘涼一帶營汛綠旗兵力稍單著於西安滿洲駐

防兵丁內挑選一千名暫行移駐涼州著都統蘇丹  
西安副都統尼瑪善統領此挑選兵丁可先期預備  
候朕再降諭旨涼州原有兵房二千餘間著甘肅巡  
撫量加修理以備移駐兵丁居住山西太原府雖舊  
有城守滿兵今再從京城派兵五百名至彼一同居  
住彈壓此所派兵丁著都統鄂善統領前往駐劄

丁丑

命岳鍾琪定議陝西甘肅兵丁補給倒斃馬匹

上諭內閣曰官兵馬匹其有倒斃免賠樁銀者各省不同從前補以中茶馬匹及後則給以朋銀採買此諸省通行之例惟有陝甘各營因停止招中茶馬之時未將動支朋銀聲明相沿至今凡有倒斃馬匹俱係兵丁出資買補深可軫念著總督岳鍾琪詳悉查明將嗣後作何准報補給之處分晰定議具奏

甲午

命兩路出征致祭所過名山大川



上諭曰兩路大將軍統領大兵進勦準噶爾凡所經過  
名山大川理應致祭著撰擬祭文書寫數十道敬謹  
用寶付兩路大將軍帶往遇有應祭山川臨時填寫  
神號虔恭致祭其所用香帛等項著該部察例辦理

丁酉

寧遠大將軍川陝總督岳鍾琪奏西路出征事

宜

岳鍾琪疏言西路出師文武各官及馬兵步兵

等當有定額一切軍需可以核計今臣議定總  
統官兵大臣一員分領官兵提督一員總兵官  
四員副將十員叅將遊擊共二十員守備四十  
員千總八十員把總一百二十員其管理駐防  
臺站撥副將遊擊各二員守備四員千總把總  
共八員至經理糧餉事務議撥道一員知府一  
員同知通判知州知縣共十員佐雜二十員凡  
文武大小各官三百二十四員馬兵步兵二萬

六千五百名一切馬駝器械跟役口糧鹽菜銀  
兩等及兵丁糧餉分別支給臣陸續核明造冊  
報銷奏入報

聞

壬寅

上以出師征準噶爾丹策零

躬詣

太廟告祭

祝文曰恭惟我

列祖聖德神功涵盖宇宙莫不尊親獨厄魯特策妄阿喇布坦世濟克頑自其叔噶爾丹悖肆猖狂我

皇考聖祖仁皇帝親率大軍剪除元惡以策妄阿喇布坦素未同逆遺餘部落聽其收撫

恩澤至渥乃不思銜感漸恣鴟張殘破拉藏荼毒生靈皇考應時戡定猶未忍即加勦戮

宣諭再三冀其知悔臣紹位以來復申諭旨伊雖遣使

乞和乃敢容留逋叛挾詐怙惡旋服冥誅其子噶爾丹策零雖亦遣使詣闕而心志詭譎言詞妄誕揆其奸狀若不迅行撲滅將來必為蒙古之巨害貽中國之隱憂臣夙夜思維茲乃我

皇考計慮多年經營未竟之緒繼

先志以行師事非不得已順

天心而致討機不容遲廷議僉諧戎行齊奮是用簡帥臣而授鉞占良日而禡牙仰憑

列祖功德崇隆聲靈赫濯旌旗所向立靖氛塵鏡鼓還  
歸早聞凱奏永綏藩圉萬邦戴丕昌之天惠保邊黎  
九服遵蕩平之路謹告

癸卯

上御太和殿

命大學士以寧遠大將軍印並

敕書一道令正使兵部尚書查弼納副使內大臣公倫  
布齋赴西安授川陝總督公岳鍾琪

命以理藩院侍郎顧魯兼內閣學士銜隨印前往

敕諭曰奉

天伐罪治世之常經鋤暴除兇安邊之遠略况醜逆陰謀詭譎斯王章顯用征誅機不容遲法無可貸厄魯特策妄阿喇布坦乃噶爾丹之逆族也昔我

聖祖仁皇帝時噶爾丹干犯

天討立時殄滅本應直搗巢穴俾無子遺蒙

聖祖仁皇帝如天之仁念策妄阿喇布坦向與伊叔齟

齟情在可原特沛鴻恩賞其部落撫綏周至再予生  
全是時伊力弱勢微小心恭順其後乃誘奪伊妻父  
之部曲萬餘戶輒敢驕肆妄行竟欲直驅青海擾其  
人衆又詭計發兵進藏荼毒生靈我

聖祖仁皇帝雖發兵致討仍賜包容遣使宣諭再三冀  
其改悔而伊怙惡不悛冥頑如故及朕紹承大寶伊  
雖遣使求和而中懷詐偽以背恩大逆之羅卜藏丹  
津負罪潛逃伊輒敢容留抗違國法中外之人莫不



忽恨朕本欲於數年間命將興師向伊詢問不意策  
妄阿喇布坦遂服冥誅其子噶爾丹策零繼立狡獪  
狂誕同於其父昨遣人陳奏之際言詞傲慢心志姦  
邪似此逆賊渠魁父子濟惡若不及時剪滅實為衆  
蒙古之巨害且恐將來貽國家之隱憂用是特發兩  
路大兵聲罪致討爰命爾為寧遠大將軍統領陝西  
等處大兵一切事宜爾與提督紀成斌酌定方略公  
同計議而行勿謂已能而不納衆論勿當事會而致

失機宜勿恃兵強而輕視賊寇密偵遠探備極周詳  
各路大兵及蒙古兵丁聽爾調遣凡遇有警即遣發  
官兵應援撲勦有能擒斬噶爾丹策零來歸者即行  
馳奏加恩優賞有情急來歸者加意撫恤其不抗拒  
官兵者勿加殺戮兵將所過地方須申嚴紀律毋得  
騷擾百姓毋得淫人婦女毋得離散人之父子夫婦  
毋得損壞人之墳墓室廬毋得強取貨物毋得驅役  
平民以副朕戡亂靖逆安民綏衆之意其或有臨戰

退縮貽悞擾亂軍機者爾會同商議文官四品以下  
武官三品以下即以軍法示衆官兵有犯小過者會  
同商議徑行處治毋以沒戎行之勞績毋寬縱違法  
之弁兵法紀務極嚴明賞罰悉期公當一切機宜爾  
商酌調遣有應知會北路靖邊大將軍者即行知會  
一同辦理將噶爾丹策零速行殲勦永靖邊陲斯稱  
委任爾等務宜殫心用力早奏膚功欽哉故敕

命肅州總兵官曹勳仍率兵出口湖廣巡撫馬會伯往

肅州辦理軍需帶管肅州總兵官印務

寧遠大將軍川陝總督岳鍾琪遵

旨議奏肅州地屬緊要鎮臣樊廷率兵出口其肅州鎮  
印務請令興漢鎮臣曹勳署理曹勳亦奉

旨領兵者今既留肅鎮臣見川北鎮臣張成隆老成練  
達曉暢軍戎現今赴京

陛見迄今速回陝西率兵出口以足鎮臣四人之數奏  
入得

旨朕思軍務關係重大曹勳明白精壯乃實心効力之  
員應仍令領兵出口岳鍾琪既稱張成隆老成練達  
曉暢軍戎朕觀其人尚壯健或可勝領兵之任著於  
原派總兵四員之外增添一員即將張成隆派出令  
其星速馳驛赴陝著大將軍岳鍾琪酌量委用至於  
肅州辦理軍需更關緊要署督查郎阿相隔路遠巡  
撫許容又屬新任著湖北巡撫馬會伯前往肅州辦  
理軍需一切與督撫等公同計議而行即帶管肅州

總兵印務甚為妥便其湖北巡撫印務著四川布政使趙宏恩前往署理四川布政使印務著四川按察使呂耀曾署理四川按察使印務著四川鹽驛道尤清署理

甲辰

命以振威揚武二將軍印送寧遠大將軍岳鍾琪軍前上諭兵部曰振威將軍揚武將軍印二顆送往西安交與大將軍岳鍾琪軍前有應用之處酌量委用

平定準噶爾方略前編卷十八

欽定四庫全書

平定準噶爾方略前編卷十九

雍正七年五月乙巳

諭出征大將軍等

上諭曰出征大將軍副將軍叅贊大臣官弁兵丁等準噶爾狡獪兇頑父子濟惡為邊境蒙古之隱患朕仰承

皇考聖祖仁皇帝先志特發兩路大兵聲罪致討當四



海昇平之時國用充裕朕細加籌畫計議再三凡命將遣官派兵運餉以及車馬甲冑兵器耕具之屬無不經理周詳備辦豐足宏綱細目具有規條而派出之官弁兵丁等踴躍歡忻爭先恐後其急公勇往之意甚為可嘉此蓋弁兵等素懷忠君報國之心而又受

皇考六十餘年教養之澤感恩慕義出于悃忱故奮發之氣若斯之壯也然軍氣當壯而軍心則不可驕孔

子論行軍之道曰必也臨事而懼好謀而成而以暴  
虎馮河為戒書經曰今予其恭行天之罰可知古昔  
聖人於軍旅之事倍加敬謹從未有以士飽馬騰兵  
甲堅利而遂生驕矜之意志嚴惕之懷也從來舉大  
事者固在人事之經營而成大功者必賴  
天心之眷佑若果仰邀

上天慈恩默垂保護則天地間非常之業不世之勳皆  
計日可以成就而感格

上天之道惟有一誠一和聖人曰至誠感神又曰和氣  
致祥古訓昭垂千載不易今此兩路大兵前往若自  
大將軍以下兵丁以上皆存一片誠敬之心一團和  
合之氣視國家之事如己事聯千萬人之心為一心  
以此感格

上蒼蒙

天心許一是字如此而大功不唾手告成者無是理也  
大將軍總統全師為三軍司命當開誠布公虛懷受

益能謀於衆能斷於心勿以私意而混人之勞勿以偏見而掩人之善信賞必罰惠愛嚴明副將軍叅贊大臣等和衷協贊合志同心共展謀猷以成韜略其一應文武官弁等各有所司均關重寄祇奉將軍之令善導所轄之人務殫公心以襄偉績至於兵丁等應思祖孫父子世受國恩今當執戈荷戟之時正効力酬恩之會况朕以至公訓諭大小臣工將軍等秉公心以馭士卒有功必錄有過必懲正宜乘時龜勉

以圖上進古人以共為一事比於同舟言其休戚相通憂樂與共也朕謂今日之事自將軍以下兵丁以上不但有同舟之誼實乃一體之親朕為元首以股肱耳目視爾等爾等衆人彼此聯屬之情當如手足臂指之痛癢相關肫誠固結不可藏嫉妬之念不可懷推諉之心且不但當存退縮規避之私衷亦並不應存輕進貪功之淺見蓋一人立功其功小衆人立功其功大果能以誠心和氣感格

上天錫福垂恩膚功克奏則凡行軍預事之人皆有光  
榮膺爵賞於朝廷垂令名於奕世豈不美歟朕自運  
籌軍務以來及師旅起程以後朕之一心時刻在於  
戎陣之間爾等宜共體此心也

甲寅

大閱於南苑

是日辰時靖邊大將軍傅爾丹等令車騎營設  
車騎鎗礮並馬步軍士各按方位旗色布列陣

式已時

上登涼鷹臺御黃幄賜諸王大臣等坐鳴海螺自臺下  
以次達營所營中擊鼓正南紅旗舉諸軍分隊  
進鎗礮齊發金鳴衆止由是而東而西而北各  
依旗色次第操演既而兩旗交展兩翼分進首  
尾相應演畢軍士歡呼凱旋各歸陣所隊伍井  
然軍容整肅綿亘周望

上顧謂大學士張廷玉等曰若等操演可謂熟練今日

天氣晴朗朕甚慰悅然此車騎營兵不過數分中之一耳他如盛京察哈爾等處精兵尚多也大學士張廷玉等奏曰三軍和氣上達於

天天人交感用昭晴朗精兵所向其誰能敵

上又謂浙江總督李衛曰此不過操演軍士之一法耳至於遇敵決勝相機度勢神而明之運用之妙存乎其人豈必拘拘排列陣伍然後可以制敵李衛奏曰皇上天兵馴熟精銳臣得瞻仰可謂見所未見



上又謂諸大臣曰此次軍務怡親王同大學士張廷玉  
蔣廷錫辦理妥協如蒙

上天默佑即奏凱歌若等之功不小怡親王大學士張  
廷玉蔣廷錫同奏曰臣等何知何能仰承

皇上指畫周詳臣等不過遵奏辦理而已奏畢賜茶即  
於營中宣

旨賜大將軍銀五千兩副將軍三千兩參贊大臣各千  
兩隨印內閣學士五百兩營總各二百兩章京

等各百五十兩司官各百二十兩中書各百兩  
筆帖式各八十兩前鋒校護軍校驍騎校各五  
十兩護軍各二十兩披甲者各十五兩車騎營  
兵各二十兩

戊午

命議叙辦解贏匹各官并增給官價

上諭內閣曰前因備辦軍需令直隸山東河南山西等  
省採買贏匹運送糧餉今直隸山東解京之贏俱屬

臆壯則地方官之採買辦理實心効力可知著查明  
各地方官採辦之多寡及肥腴之高下分別等次交  
部議叙以示嘉獎其解送之員一併酌量議叙從前  
議定每羸一頭給與官價十二兩今所解羸匹甚好  
諒官價及每日喂養准銷之銀必不敷用著據實報  
明於本省存公銀兩內給發但不得借此恩旨滋浮  
冒之弊著該督撫公平辦理後不為例其河南山西  
二省所辦羸匹解交陝西者著岳鍾琪驗看據實具

奏若能如解京之辦理妥協亦著一體加恩

壬戌

命速行卹賞陣亡官兵等并豁免預借銀兩

上諭內閣曰自本朝開國及平定三藩廓清朔漠以來  
褒忠錄功之典最為優渥凡文武官弁兵丁之効力  
行間著有勞績及臨戎致命遇敵受傷者皆赤心報  
國之人朝廷沛澤加恩惟恐不速乃近年以來部臣  
辦事遲緩因循往往因一二事之駁查遂將衆人卹

賞之典俱致淹滯卽如陝甘川省從前攻勦南川北  
川青海臬子山等處之文武官弁兵丁已經查核明  
晰應行卹賞議叙祇因青海等處功加冊結內有原  
任巡撫王景灝同知張梅草職離任所造冊結無印  
可鈐部議駁查以致南川等案卹賞之處一併稽延  
經朕察訪而後知之夫官弁例應議叙者不得早沾  
國恩固為不可而陣亡受傷人等遲至數載之後尚  
未邀帑金之賜尤可憫惻著該部速行卹賞議叙嗣

後凡有出兵加恩之案其中若有應行駁查者止將  
應查之人扣除俟查明補給不得因一二人之行查  
而稽遲衆人應得之恩典將此永著為例又如從前  
進藏出征之官弁兵丁若有預借銀兩而本身陣亡  
或在軍中受傷病故者除照例卹賞外其所預借銀  
兩槩免追還

六月丁丑

命封索諾木達爾扎為輔國公

達賴喇嘛之父索諾木達爾扎奉表貢方物理  
藩院以

聞得

旨索諾木達爾扎乃達賴喇嘛之父指教達賴喇嘛學  
習經典保護達賴喇嘛勤勞多年西藏之事毫不干  
預甚屬可嘉著封為輔國公

癸未

諭怡親王等密辦軍需事宜寧遠大將軍川陝總督公

岳鍾琪專辦西路軍務

岳鍾琪疏言噶爾丹策零三世弗庭百夷被虐  
天怒人怨衆叛親離我

聖祖至德洪慈再三寬宥

皇上深仁厚澤屢欲矜全而終不悛悔猶復肆其猖狂  
不道之語見於表箋若不大彰

天討則冠履之分不明番夷之禍不息臣仰承  
廟謨至周極備約舉



王師之十勝決逆酋之必敗一曰

主德二曰天時三曰地利四曰人和五曰糗糧之廣備  
六曰將士之精良七曰車騎營陣之盡善八曰  
火器兵械之銳利九曰連環迭戰攻守咸宜十  
曰士馬遠征節制整暇又加以期日之寬舒機  
宜之詳密凡此勝畧咸出

聖心臣得効奔走微勞便成殊績惟冀指日蕩平獻俘  
奏凱以報

國恩奏入得

昔準噶爾世濟凶頑心懷叵測將來必為蒙古之巨患  
貽國家之隱憂是用發兵聲罪致討上承

先志下靖邊陲師出有名事非得已兩路軍機朕籌算  
者久矣其軍需一應事宜交與怡親王大學士張廷  
玉蔣廷錫密為辦理其西路辦理事宜則專於總督  
岳鍾琪是任王大臣等小心慎密是以經理二年有  
餘而各省不知有出師運餉之事今覽岳鍾琪摺奏

備陳十勝之情形軍務所關重大朕不敢預言其必  
然惟有倍加敬謹仰懇

上天

皇考鑒照不得已之情垂慈默佑早奏膚功而已

命賞兗州右營車兵李中倫

靖邊大將軍公傅爾丹奏言兗州右營車兵李

中倫拾銀二封既而訪知為北樓營車兵韓吉

玉所遺請歸之吉玉願以金歸中倫中倫堅辭

不受應加獎賞奏入得

旨講讓興廉最為美俗而師旅出征尤以人和為貴今  
李中倫拾取遺金知為恩賞軍士之物即時稟知該  
管將弁情願給還本人似此見利思義同心同力之  
忱悃甚屬可嘉著賞銀六十兩以示嘉獎並傳諭內  
外直省兵丁等果聞風慕義共登善行必仰蒙

上天之賜同受國家之恩矣

命賞總理西藏事務副都統馬拉銀二千兩協理西藏

事務西寧總兵官包進忠銀一千兩整裝

乙酉

命蠲免甘肅四川等處額徵錢糧

上諭內閣曰朕愛養黎元遐邇一體而邊遠之地小民家計不及近省尤朕心之所繫念數年以來甘肅四川雲南貴州廣西五省有用兵西藏及勦撫苗蠻等事其一應軍需皆動用公帑備辦秋毫不派及於民間而糧餉轉輸亦有資於民力今藏地苗疆俱已寧

謚朕心嘉慰特沛恩膏著將庚戌年甘肅四川雲南  
貴州廣西額徵地丁銀兩悉行蠲免其西安各屬地  
方近日亦有預備軍需之事朕心軫念著將庚戌年  
額徵錢糧蠲免十分之三此六省督撫大吏宜仰體  
朕心轉飭所屬有司敬謹奉行務使閭閻均霑實惠  
如有奉行不力被不肖有司暗飽私橐或姦胥土棍  
強紳劣衿包攬侵蝕者經朕訪聞必將通省大小官  
員分別從重治罪至於國家設官本以理民官有恤

下之責民有奉上之義若設官而不為計及養廉之  
資則有司之賢者將窘迫而莫能支不肖者又橫取  
而無所檢是以酌定將錢糧耗羨均給各官此揆情  
度理上下相安之道但思加恩百姓豁免正賦若將  
耗羨一併蠲除是民雖邀額外之恩而官員轉有拮  
据之苦上司或因此稍有寬假則必致巧取苛索於  
民流弊種種轉多於耗羨之數於吏治民生均無裨  
益著於庚戌年為始凡遇特恩蠲免錢糧者其耗羨

仍舊輸納諒必民所樂從若因水旱蠲免者不得徵  
收耗羨將此永著為例

乙未

命靖邊大將軍傅爾丹等出師北路

上御太和殿命大學士公馬爾賽蔣廷錫捧

敕印授靖邊大將軍公傅爾丹大將軍率出征各官等

行禮畢

上還宮申時



上率大將軍副將軍叅贊大臣及在京諸王貝勒貝子  
公內大臣大學士都統尚書等詣

堂子行禮次鳴螺兵部設大纛復於纛前行禮東

長安門外設黃幄

上御幄大將軍副將軍叅贊大臣等咸佩弓矢跪辭

上親解御用數珠賜大將軍公傅爾丹大將軍行跪抱  
禮副將軍叅贊大臣等各以次行跪抱禮

上諭大將軍等曰爾等此去和衷共濟速奏膚功凱旋

時朕當出郊勞師爾等勉力大將軍公傅爾丹奏曰

臣等蒙

皇上訓諭周詳務期同心協力迅掃氛塵仰答

恩榮奏畢

上親視大將軍等上馬啟行

還宮是日於德勝門外列兵處

賜宴

命王大臣授大將軍副將軍茶酒禮部兵部大臣授參

贊大臣茶酒侍衛授出征各官茶酒禮畢大將  
軍等望

闕謝

恩

辛丑

增設噶達等處駐防兵

川陝總督岳鍾琪奏言乃者噶達建廟以居達  
賴喇嘛設兵守護尤要現在化林協有兵千人

請留兵三百駐化林坪更設都司一員千總一員把總二員彈壓之移兵二百駐打箭爐令化林守備領把總一員分防以五百人移駐噶達令化林副將領把總二員再設一中軍都司一千總令赴噶達防護至噶達外雅籠江上中下三渡並要隘請設二千總各率兵百人分守上下二渡設一守備率兵二百守中渡又噶達之西吹音堡亦屬雅籠江渡口設一千總率兵百

人分防化林所屬舊有黎雅我邊二營今既移  
兵駐噶達可就近移黎雅營屬建昌鎮我邊營  
屬永寧協嗣後有自歲來噶達者令西藏噶卜  
倫給發圖書路引以便稽察議政王大臣等議  
悉如所請奏入

上從之

壬寅

增設陝西河州協遊擊一員千總一員把總二

員兵八百名駐劄薩喇把總一員兵八十名與  
舊所設守備同駐保安堡並屬西寧鎮管轄從  
川陝總督岳鍾琪請也

秋八月辛酉

命蘇圖暫行來京候

旨

上諭兵部曰寧夏副都統蘇圖現領寧夏兵丁前往軍  
營著伊暫行來京候旨其寧夏兵丁著副都統舒楞

額馳驛速往暫行管轄俟蘇圖到時著舒楞額回京

九月乙亥

議叙平定青海功陝西在事官兵等進階賞卹

有差

戊寅

命免甘肅西寧大同歷年倒弊駝隻應賠銀兩

己丑

命免寧夏等處及嘉峪關外各衛所額徵本色

上諭內閣曰年來用兵西藏勦撫苗蠻一切辦理軍需皆動支公帑而糧餉轉輸不無資於民力朕心深為軫念是以降旨將甘肅四川雲貴廣西五省庚戌年地丁錢糧全行豁免查甘屬河西之寧夏西寧甘涼四府及肅州以至嘉峪關外之靖逆赤金柳溝等衛所歷年額徵俱係糧料草束與各省額徵折色無異今當用兵之際雖絲毫不派及民間而黎民踴躍急公之意大將軍岳鍾琪屢次奏聞甚屬可嘉著將額



徵本色加恩豁免以示惠愛邊民之至意

十月甲寅

命西安將軍常色禮移駐涼州以署川陝總督查郎阿  
兼理西安將軍印務

命護送準噶爾使臣特磊赴京

寧遠大將軍岳鍾琪奏言噶爾丹策零使臣特  
磊於十月初五日至洮賚大坂斥堠翼日臣令  
理藩院員外郎黑色引至巴里坤軍營據特磊

云噶爾丹策零已令人執送羅卜藏丹津至伊  
勒布爾和碩遇蒙古逃人云總督今率兵二萬  
逕出哈密問罪是以仍歸羅卜藏丹津於伊犁  
輕騎齎摺而至臣以特磊之言未可深信遣叅  
將劉廷琰等送特磊至肅州謹加防範奏入得  
旨著劉廷琰伴送特磊赴京

丙辰

喀爾喀扎薩克多羅郡王達瑪林多爾濟遲悞

軍需駝隻

命黜其爵

戊辰

命加靖邊大將軍傅爾丹寧遠大將軍岳鍾琪為少保  
吏部尚書查郎阿寧夏將軍席伯為太子少保

十一月甲戌

定噶斯軍營事宜

議政王大臣等遵

旨議覆曰噶斯為準噶爾通青海西藏要口宜撥兵駐守已奉

旨遣張廷棟葛森鼐滿岱傅寧等辦理軍需今酌定軍

營事宜恭候

欽定一撥遣官兵選京師八旗兵二百以前鋒叅領護軍叅領前鋒侍衛副護軍叅領護軍校等二十四人領之選歸化城兵三百以叅領佐領護軍校驍騎校等十人領之其科爾沁等四十三旗

選兵一千以台吉都統副都統叅領佐領驍騎  
校等領之青海等三十旗選兵千五百以台吉  
等領之其支給跟役口糧馬匹器械賞賚糧餉  
悉如路北大兵之例一定軍行日期八旗兵以  
明年正月歸化城兵以三月科爾沁青海等兵  
酌量於青草發生時游牧而往一柴達木至嘉  
峪關其間應設臺站以遞文檄一噶斯地窄可  
駐兵百人餘並駐柴達木柴達木之西為得卜

特爾駐兵六百又西為察罕烏蘇駐兵四百兩  
地水草足資游牧所在聲援更聯屬矣奏入

上從之

丙子

命加恩山西承辦軍需官民

上諭內閣曰前因北路軍需須用駱駝鞍屨諭令山西  
地方製辦聞該省人民凡有羊毛繩料之家各出所  
有赴官領價工匠亦一時爭先應募共計二十餘萬

件之物料工作不勞而集於月餘之內此皆該省大吏平日善於訓導民人其製辦器物催募人工照數給與價值而該省民人又懷尊君親上急公趨事之心是以備辦軍需羣情歡躍尅期告竣甚屬可嘉巡撫石麟布政使蔣沅著交部議叙凡委派辦理之員亦著議叙再將該省辛亥年額徵地丁銀蠲免二十萬兩於辦理鞍屨之各州縣按畝均派使小民共霑實惠以示朕恩獎官民之至意尋山西巡撫石麟疏

言軍前所需駝屨等物據士民等願自備車騾  
運送歸化城奏入得

旨前因軍前需用駝鞍屨令晉省製辦三萬副該省  
人民急公趨事朕已降旨蠲免該地方辛亥年額徵  
銀二十萬兩以示嘉獎今因運送鞍屨該省士民等  
又復歡欣効力甚屬可嘉著該撫等傳旨獎諭仍令  
各領應得之腳價不必固辭

己卯



予克什圖席伯世職

上諭內閣曰管理阿爾台臺站內大臣克什圖寧夏將軍席伯俱係軍前効力勞績茂著之人著各賞給騎都尉世職

丁亥

以西北兩路大軍所至水泉效順

命建廟祀之

上諭內閣曰前據靖邊大將軍傅爾丹摺奏統領北路

大兵出口已到阿爾台駐劄所過沙磧地方從來無  
水草之處今歲青草暢茂清泉湧溢士馬飽騰且冬  
月天氣和暖清明衆心無不歡忭又口外料理臺站  
之內大臣克什圖來京所奏相同又據寧遠大將軍  
岳鍾琪摺奏統領西路大兵出口已到巴里坤駐劄  
所過沙磧地方水草並無缺乏道途坦適天氣晴和  
軍旅歡忭以為神助等語自兩路大兵啓行以來邊  
塞長途深繫朕念仰蒙神明默佑士馬安寧且於沙

蹟從無水草之區顯賜靈應朕心實為感慶應於北路西路各建廟宇虔誠展祀以答神貺

戊子

命兵部尚書查弼納等往陝西督理軍需諸務

上諭內閣曰西路軍需前經寧遠大將軍岳鍾琪悉心經理籌畫周詳一一妥協今岳鍾琪領兵出口乃地方巡撫大吏有司之專責自應竭力遵照辦理而許容在任凡事推諉馬會伯但以潔己為務不肯擔荷

查郎阿武格又係新任諸凡未諳上司屬員彼此猜疑推卸明年乃進兵之期關係最為緊要伊等之身家性命猶其小者耳應命在京大臣前往稽察督理方於軍務有益著兵部尚書查弼納往陝總理稽查軍需諸務常德壽常賚俱著各給印信並令乘驛往來遇有分辨之處即分任其事仍聽查弼納調度凡關係軍需事件俱著查弼納等相機派委該督撫料理其有應行續辦者即令地方官動支錢糧辦理奏

聞若地方官有侵欺擾民者一面草職拿問一面奏請審擬其怠忽遲延者自督撫以及文武官弁俱著即行題叅如有指稱軍需名色擾累民間之棍徒胥役著即題請正法

己丑

都爾伯特扎薩克固山貝子巴圖卒以其子班珠爾襲爵

乙未

命支官帑糴屯田餘穀

署川陝總督查郎阿疏言安西沙州等處募民屯墾計二千四百有五戶所種小麥青稞粟穀糜子等物每種一斗約收三四斗其餘雜植並豐阜家給人足歡欣樂業臣恐口內困戶奸民興販射利已嚴加糾察禁止並諭民戶按一年所需存貯外餘即糴諸本地以濟兵丁商民口食奏入得

旨安西屯墾地畝今年人力既勤天時復稔各種糧穀俱獲豐收朕心深為慰慶今查郎阿禁止姦徒興販射利辦理甚是惟是飭令民戶多餘之穀只許在本處糶賣尚未妥協朕思民戶盈餘之穀原期糶價以為日用之資若本地糶穀者少則出糶未免艱難不可不為計及著該地方官酌量本地情形不必相強若有將盈餘之穀情願出糶者著動支官銀照時價糶買存貯公所明年倘有需用之處聽辦理軍餉之

大臣及該督撫行文支撥安西現有備用銀兩即可  
動用採買再於西安藩庫撥補還項此朕體恤民戶  
俾糶穀得價用度豐裕之至意著地方官善於奉行  
不可勒令糶賣生事滋擾

青海厄魯特扎薩克輔國公策凌卒以其子塞  
卜騰達什襲爵

十二月辛丑

晉封哈密鎮國公額敏為固山貝子



丁未

命鄂善赴涼州

上諭兵部曰鄂善著前往涼州協同秦布辦理事務其駐劄大原兵丁著石麟暫行管理

戊申

命免進藏各官借支庫銀

上諭內閣曰康熙五十九年陝西解送駝馬進藏文武官五十員每員借支肅州公庫銀五百兩為行裝路

費之資本係應給之項因當時該督撫未經題報不敢作正項開銷是以各員回陝之時仍於各名下著追補項至今尚有未完銀一萬六千八百兩朕念伊等効力戎行遠涉藏地雖非衝鋒破敵者比而間關行役亦屬可憫著將未完銀兩槩行豁免其已完者悉給還本員或交伊之的屬如該員有別項虧欠應追者即准其抵補以示優恤勞役之意

己酉

振武將軍順承郡王錫保奏報鄂爾昆濟爾瑪  
台圖拉三處屯田收穫大麥小麥糜子共七千  
五百五十石有奇奏入得

旨下部知之

已未

議叙進勦桌子山棋子山青海等處功

前涼莊道陞任山西布政使蔣洞等各加級紀  
錄有差已故西寧道趙世錫等各予一子入監

讀書尋復子陣亡遊擊姬登第署守備張先志  
王伏金祭葬如例千總施進祿傅瑾把總賀奉  
金陳昌王谷弼楊之連等各祭一次又喀爾喀  
扎薩克台吉巴爾漢等賞賚有差

平定準噶爾方略前編卷十九

欽定四庫全書

平定準噶爾方略前編卷二十

雍正八年春二月戊辰

命綏安西沙州等處屯田陞科

上諭陝西總督巡撫等曰安西沙州等處招民屯墾原為惠養邊民之計是以累年以來備極籌畫經營期其得所今從雍正六年民戶到齊之日計算至辛亥年例當輸賦之期但念小民甫經安插公私無顧為

難著寬期二年於癸丑年陞科俾民力寬裕俯仰有資以副朕格外加恩之至意

三月甲戌

命西藏辦事內閣學士僧格率兵一千五百至騰格里

淖爾駐防

五月丁丑

召西北兩路大將軍等赴京籌議軍務

上諭大學士等曰準噶爾噶爾丹策零藏匿負罪潛逃

之羅卜藏丹津抗違國法因特發兩路大兵聲罪致  
討期於今年進發直搗伊犁今噶爾丹策零遣使特  
磊奉表陳奏謂已將羅卜藏丹津解送天朝因聞進  
兵之信暫行中止若天朝俯念愚昧赦其已往即將  
羅卜藏丹津解送等語朕欲將特磊遣回并差大員  
至準噶爾諭以受封定界敦族睦隣速將逃匿送出  
伊若一一聽命朕當寬宥其罪其進兵之期暫緩一  
年俟特磊起身之後著寧遠大將軍岳鍾琪靖邊大



將軍傅爾丹叅贊大臣陳泰蘇圖來京其靖邊大將軍印務著副將軍巴賽護理并令署振武將軍順承郡王錫保就近協理所有應行事宜著馬爾賽張廷玉蔣廷錫等詳議具奏尋議曰靖邊大將軍傅爾丹至京約在九十月間應令行文寧遠大將軍岳鍾琪先後偕來會同籌議奏入得

旨兩路大將軍於九月間起身來京則到京之期已在冬底未免太遠著兩路大將軍在九月十五日前後

到京現今差侍郎杭奕祿衆佛保同特磊往諭準噶  
爾岳鍾琪俟特磊回過軍營之後即將起程日期知  
會傅爾丹酌定起程靖邊大將軍印務已命副將軍  
巴賽等護理寧遠大將軍印務應令何人護理著岳  
鍾琪奏聞其陳泰所統官兵著查克旦署理蘇圖所  
統官兵著舒楞額署理再著副都統圖克善黑色前  
往軍營交與傅爾丹酌量派管軍營事務

乙未

命各路兵擇所在便宜駐劄

上諭理藩院曰前往岳鍾琪處額駙阿寶帶領該旗兵  
五百名目今行至何處著行文阿寶即於彼處駐劄  
候旨綽本帶領鄂爾多斯兵五百名亦著行文綽本  
就近揀水草佳處駐劄候旨此一千兵著行文詢問  
大將軍岳鍾琪或今年調往巴里坤或俟明年進兵  
之前調往二者孰為有益並兵丁錢糧足與不足俱  
著大將軍岳鍾琪定議具奏再派往噶斯之京城兵

歸化城兵共五百名此時將及到彼著格默勒帶領  
在噶斯駐劄富寧亦著前往噶斯與格默勒一併管  
理達鼐著來西寧仍與鼐滿岱辦理事務所有扎薩  
克蒙古等兵著交與達鼐管理或在西喇塔拉地方  
或在從前額駙阿寶奏請駐劄之烏蘭穆倫等處相  
視形勢駐劄俟明年文到之日前往噶斯其青海之  
一千五百兵相近噶斯今年只在各游牧處預備亦  
俟明年文到之日前往噶斯達鼐既到噶斯管理之

後富寧著回西寧辦理事務

秋七月壬申

調鄂爾多斯青海蒙古兵一千赴軍

寧遠大將軍岳鍾琪遵

旨議奏請調鄂爾多斯青海蒙古兵撥往牧馬者一千

人於今年赴軍營大學士等議覆應如所請奏

入

上從之

戊寅

暫撤學士僧格等巡防兵

議政王大臣等議奏學士僧格貝子頗羅鼐所  
領巡防兵應令於降雪後撤回俟明年進兵仍  
往騰格里淖爾駐劄奏入得

旨今年大兵既停進發著行文與僧格等令伊等酌量  
於未降雪之前撤回明年著僧格仍舊帶往其綠旗  
官兵照今年賞給之例賞給再發銀一萬兩著頗羅

鼐明年酌量賞給唐古忒等之兵

八月甲辰

寧遠大將軍岳鍾琪奏報赴京日期

岳鍾琪奏言奉使大臣杭奕祿等於八月初四日攜特磊至軍臣導

旨責以大義惕以軍威觀特磊等情狀若誠心感悟者即於八月初六日遣特磊還所有寧遠大將軍印務遵

旨交提督紀成斌護理隨印侍郎顧魯協辦臣於初八日就道赴京已咨會靖邊大將軍傅爾丹奏入

報

聞是冬岳鍾琪與傅爾丹並入京

陸見

壬申

喀爾喀扎薩克多羅郡王旺扎爾遲悞軍需駝

隻



命黜其爵

丁亥

上諭兵部曰周瑛著發往北路大將軍傅爾丹軍營効

力贖罪

北路軍營總兵官魏麟約束不嚴

命罷之

冬十月己亥

寧遠大將軍岳鍾琪奏報巴里坤圖古里克等

處屯田收穫青稞凡一萬一千六百石有奇奏  
入得

旨下部知之

辛丑

賞吐魯番効力回人

上諭內閣曰據寧遠大將軍岳鍾琪奏稱吐魯番回目  
額敏和卓屯田種地恭順効力甚屬可嘉朕聞之深  
為喜悅額敏和卓賞緞二十疋其種地効力之回民

賞銀二千兩著提督紀成斌差遣弁員前往吐魯番  
會同額敏和卓秉公賞給以示朕加恩外番之至意

癸卯

命總理西路軍需尚書查弼納來京

上諭大學士等曰尚書查弼納著馳驛來京西路軍需  
著查郎阿前往肅州辦理仍兼理川陝總督印務秦  
布著回西安將軍之任護軍統領宗室哈爾吉著前  
往涼州代秦布統領兵丁仍著鄂善協理

乙巳

寧遠大將軍岳鍾琪奏報哈密塔勒納沁等處  
屯田收穫麥青稞凡四千六百石奏入得

旨下部知之

巳酉

命原久辦軍需各員之小過應劾者

上諭內閣曰辦理軍需必得熟練之員方為有益陝甘  
二省州縣官員備辦軍需有經手數年者有經手一

二年者似此熟練人員若因細過微瑕即行叅革則  
接任之員初辦軍務未免生疎或至遲悞嗣後陝甘  
地方辦理軍需之州縣官員若無大過其所犯情有  
可原者著該督撫撥情度理量加寬宥若錢糧微有  
不清而事屬因公者統俟大軍凱旋之後查核明白  
以定功過

辛亥

命兵部尚書查弼納為北路副將軍

上諭大學士等曰兵部尚書查弼納著為副將軍命往北路與靖邊大將軍傅爾丹副將軍巴賽辦理軍務副都統德祿著往北路軍前與隨印之內閣學士永國辦事副都統馬爾薩著授為內大臣與陳泰蘇圖海蘭叅贊軍務戴豪袞泰石禮哈不必叅贊軍務舒楞額不必來京著前往振武將軍處代馬爾薩辦事黑色圖克善俟大將軍到營著令來京石禮哈不暗滿州軍營事務著管綠旗兵丁但不可膺統轄之任

著大將軍等酌量派委

壬子

命酌留帑銀貯府州庫以備軍需

上諭內閣曰向因大興宛平二縣近在輦轂之下常有速辦之公事不得不那移庫銀以濟用而上司察知每以虧空題叅至於罷斥治罪實為可憫用沛特恩於大宛二縣各發庫銀一萬兩存貯該縣倘遇有速辦之公事准其詳明府尹動支應用此朕體恤有司

之至意也近思辦理軍需之州縣其急切應付之處不容刻緩而該州縣並無存貯備用之項若擅動公帑又干嚴譴有司實處兩難不可不為籌及朕意欲於辦理軍需及事務繁劇之州縣亦做大宛之例酌留帑銀以備急切公事之用其如何舉行俾辦公有賴而弊實不生著大學士會同大將軍岳鍾琪總督高其倬悉心定議具奏尋議曰嗣後辦理軍需之省計其事之繁簡留銀三十萬或二十萬兩其事



簡而地饒者留銀十五萬或十萬兩令督撫布政使發各府及直隸州貯庫所屬州縣有軍務急需即時請給其相距遼濶而事不容緩者許一面申請一面先於本庫支用俟給發後補還仍令按事報銷督撫布政使嚴為稽核奏入

上從之

丁巳

命舉陝西出征將佐署任者

上諭內閣曰陝西副將叅將等官派令出征者甚多其員缺俱須另員署理而本省弁員各有辦理之事難以兼顧著大將軍岳鍾琪於直隸山西兩省叅將遊擊內有平日知其才具可用者舉出具奏候朕酌量命往陝西以備委署之用其直隸山西之缺著該上司遞行委署再將來引見武弁時著兵部奏明有可勝陝西之任者朕酌量命往

壬戌

以正紅旗護軍統領宗室哈爾吉為右翼前鋒  
統領仍留涼州辦理軍務

十一月丙子

振武將軍順承郡王錫保奏報鄂爾昆圖拉濟  
爾瑪台等處屯田收穫大麥小麥糜子凡六千  
六百五十石有奇奏入得

旨下部知之

壬午

改設近邊郡縣

寧遠大將軍岳鍾琪奏言設立近邊郡縣事宜  
一陝西延安府屬榆林靖邊神木三廳轄沿邊  
三十堡除神木同知所轄東十堡已改屬州縣  
外其榆林同知所轄中十堡靖邊同知所轄西  
十堡番漢雜居必用大吏彈壓請改榆林廳為  
府以知府領之府屬設照磨一員并設榆林靖  
邊定邊懷遠四縣縣設知縣典史各一員改榆

林衛教授為府教授榆林靖邊衛訓導為縣訓  
導其定邊懷遠二縣學即以綏德膚施二縣訓  
導改設並隸榆林府一榆林既增置郡縣足資  
分理其舊設榆林靖邊同知及波羅州同知威  
武鎮靖巡檢榆林廣育倉大使悉請汰之惟留  
神木同知以司糧捕一榆林道舊轄延安綏德  
鄜州等處今榆林既改為府請改神木道為延  
綏道移駐綏德州轄延安綏德鄜州等處其新

設榆林府及延綏道所屬直隸葭州吳堡府谷  
神木諸州縣悉改隸榆林道吏部議覆悉如所  
請奏入

上從之

壬辰

軍營八旗兵請仍留駐防許之

署振武將軍順承郡王錫保奏八旗駐防官兵  
具言軍營効力兩年一切巡收諸事皆已習練

願仍留駐防以俟大兵凱旋不必三年更代如  
例奏入得

旨此奏甚屬可嘉著照官兵所請行種地綠旗官兵仍  
照舊更換

十二月丁酉

靖邊大將軍傅爾丹自京赴北路軍營

戊戌

命增給嘉峪關營汛兵丁折支米豆草束銀兩

上諭兵部曰前因口外用兵哈密為軍需往來之地特准大將軍岳鍾琪之請將駐防兵丁口糧鹽菜加恩增給又准署總督查郎阿之請將肅鎮兵丁折支米豆草束銀兩各行增給總以肅州哈密一帶地方兵馬往來物價未免昂貴故加於常格之外也今思嘉峪關在肅州哈密之間其地苦寒所需兵糧皆從肅州轉運事屬一體其營汛兵丁折支米豆草束之價俱著照肅鎮之例米豆每石加銀五錢每草一束加



銀一分其加增之期亦照肅鎮補行給發以示朕軫恤之至意

壬寅

寧遠大將軍岳鍾琪自京赴西路軍營

乙卯

準噶爾賊人潛入科舍圖卡倫盜駝馬我西路兵擊敗之

命北路並嚴防禦

護理寧遠大將軍印務紀成斌奏報準噶爾賊人率醜類二萬餘乘我西路不備犯科舍圖卡倫來盜駝馬總兵官樊廷副將冶大雄等率兵二千轉戰七晝夜力保兩卡倫與總兵官張元佐等合擊殺賊無算盡奪還所盜馬駝奏入得旨所奏逆夷盜趕駝馬情形大學士等可傳諭靖邊大將軍傅爾丹叅贊陳泰蘇圖令其行文副將軍巴賽等駐收和博克薩里之逆夷或遣賊衆至北路卡倫

偷盜駝馬亦未可定宜小心防範不可疎忽亦不可  
聞信矜張務宜鎮靜嚴密萬全無弊傅爾丹等亦速  
馳赴軍營斟酌妥辦

丁巳

命以撫遠大將軍印授岳鍾琪於途中辦理軍務

上諭大學士等曰大將軍岳鍾琪從西安由肅州前赴  
軍營途中有調撥兵丁辦理軍務之處須用印信行  
文前所頒寧遠大將軍印信留在軍營今特將撫遠

大將軍之印遣員賫送交與大將軍岳鍾琪領受大將軍未到軍營以前一切行文俱用撫遠大將軍印既到軍營以後仍用寧遠大將軍印將撫遠大將軍印繳回并著大將軍岳鍾琪接到諭旨印信之日通行所屬知之

撥各路兵赴涼肅等處

上諭大學士等曰涼州駐防滿洲兵丁一千名著右翼前鋒統領宗室哈爾吉原任都統鄂善帶領前往肅

州再著西安將軍秦布在西安駐防滿洲兵丁內挑  
選一千名交與副都統僧保張正文帶領前往涼州  
駐劄再撥涼州綠旗兵丁一千名令山西太原總兵  
王緒級馳驛前往帶領赴肅州太原總兵印務著李  
如栢署理宣化總兵印務著三屯營副將高宏榮署  
理固原提標兵丁或撥一千名或撥二千名令大將  
軍岳鍾琪酌量調撥京營副將張存孝著加總兵銜  
馳驛前往肅州聽大將軍委署統理寧夏將軍印務

著刑部侍郎常賚署理寧夏兵丁著預備一千名俟  
有調撥之處著副都統卓鼐統領前往此各路所派  
弁兵及統領之員俱聽大將軍岳鍾琪調度節制其  
辦理軍需署肅州總兵印務馬會伯亦聽大將軍派  
委張存孝著賞內庫銀二千兩僧保張正文卓鼐王  
緒級各賞銀一千兩其調撥西安涼州滿洲及固原  
提標涼州鎮標各官弁照例賞給二年俸銀馬兵每  
名賞銀三十兩步兵每名賞銀二十兩寧夏官兵若

有調撥之處亦照例賞給

戊午

選募勇健

上諭大學士等曰固原甘涼等處兵丁有調撥派遣之  
用沿邊地方所關緊要著大將軍岳鍾琪署總督查  
郎阿作速行令各該提鎮於固原涼州甘州寧夏西  
寧等處人民內挑選漢仗勇健弓馬嫻習者招募充  
補兵額其衝要之處於原額之外各添設數百名以

備調遣

命撥諸路兵調提督副都統等官赴陝西駐防

上諭大學士等曰噶斯地方現有滿洲及歸化城兵丁五百名格默勒等帶領防守其從前派出之青海兵丁一千五百名亦著前往令格默勒等分派駐劄於額爾貢穆柴達木等處其扎薩克之官兵著移駐額駙阿寶駐牧相近之處聽阿寶管轄如有準噶爾信息力能進勦著阿寶帶領前進倘力稍不足即著進



邊協同綠旗官兵防守又

諭曰直隸古北口提督范時捷著署理陝西固原提督  
即速來京請訓馳驛前往福建陸路提督石雲倬廣  
東潮州總兵馬紀勳著前往陝西肅州到大將軍岳  
鍾琪處有辦理之事又

諭曰江寧將軍鄂彌達在滿洲駐防兵丁內揀選一千  
名令副都統阿克山帶領前駐西安駐防再著副都  
御史二格由京前往統領之此派出兵丁著該督撫

動支公用銀每人賞給三十兩其應派官員著鄂彌  
達酌量派出每員各賞給一年俸銀於司庫動用銀  
兩支給二格著賞內庫銀三千兩阿克山著該省督  
撫於公用銀兩內各行寬裕幫給再撥河南滿洲駐  
防兵五百名著副都統職銜城守尉白清格帶領前  
往西安駐防撥山西太原滿洲駐防兵三百名著城  
守尉覺羅察庫帶領前往寧夏駐防此二省派出官  
員每人各賞給一年俸銀其兵丁各賞給銀三十兩

於司庫支給官員等照例給與馬匹兵丁等於每人  
給三馬之外酌量增給其河南城守尉印務著總督  
田文鏡兼管另派叅領一員轄理兵丁太原城守尉  
印務著巡撫石麟兼管白清格察庫啓程該督撫各  
行寬裕幫給

辛酉

定調撥兵馬糧運事宜

上諭大學士等曰據查郎阿奏報肅州存營馬兵祇三

百名守兵祇四百名協防之兵更不可少已飛咨都  
統鄂善於涼州駐防滿洲兵內派兵五百名遴委協  
理一員統領星赴肅州駐劄再甘涼提鎮二標馬步  
兵丁除原派出兵并現調應援外存營兵丁亦有汎  
防之責如或另有調遣不便再於二標派撥等語查  
郎阿於涼州駐防滿洲兵丁僅撥五百名者想因未  
見朕另撥西安駐防滿洲兵丁一千名之旨所以不  
敢全撥應仍遵前旨令哈爾吉鄂善作速帶領兵丁

前往肅州其涼州綠旗兵丁俟王緒級到後方行帶  
往此時諒未起程今或仍可將涼州前派之兵令王  
緒級帶領往肅或於查郎阿調甘待撥之寧夏兵丁  
內令王緒級帶領一千名往肅著大將軍岳鍾琪署  
督查郎阿酌量妥辦至查郎阿所奏摘撥馬匹陝甘  
各處營馬雖有一萬八千餘匹可供摘撥然營馬亦  
屬緊要著將上駟院之馬一千七百匹解送至西安  
交與巡撫武格分發喂養其摘撥四省營馬與採買

之馬著岳鍾琪查郎阿先酌定應交與何處收收即  
速行文知會各省文到之日再行解送至所指之處  
交收再查郎阿奏請西寧糧米撥運肅州一條西寧  
地方實關緊要存貯米粟不可輕動可令查郎阿知  
之將爾等所議馬匹糧運一摺查郎阿三摺俱錄寄  
大將軍岳鍾琪令其斟酌而行將此傳諭大將軍岳  
鍾琪總督查郎阿知之

壬戌

命西北兩路軍營議築城駐兵

上諭大學士等曰準噶爾乘我不意傾其賊衆盜趕馬駝狡獪凶惡罪無可赦但西路所存駝馬不無疲乏是從前所議直搗伊犁之計尚非萬全之道朕意欲於西路巴里坤北路之卡倫外各築一城以重兵駐劄時出遊兵以掩擊其衆擒擄其人畜賊兵必撤其游牧之所遠行藏退我當更進數百里擇地築城開墾屯種以資軍食駝馬牛羊無事牧放有事則盡收

入城賊衆既無所獲我軍一出可以襲取其輜重且賊必不敢踰我軍駐劄之城而東矣著岳鍾琪詳悉定議北路傅爾丹處亦詳細密商之

甲子

命停喀爾喀兵往卡倫

上諭大學士等曰自有軍務以來喀爾喀等甚為出力來歲大兵進剿之時所有派在卡倫預備之二千名喀爾喀兵丁不必前往俾其得以照管牲牧著派出



內扎薩克之兵二千名前往卡倫駐劄令科爾沁部  
王羅卜藏喇錫翁牛特貝子羅卜藏教漢公羅卜藏  
總統管理此所派出之官兵照例加與恩賞

防護阿濟必濟卡倫

北路大將軍傅爾丹遵

旨議奏曰臣等閱紀成斌所奏慮準噶爾賊人或分兵  
來犯阿濟必濟卡倫擾喀爾喀公通摩克及輝  
特公巴濟游牧臣行文副將軍巴賽等選精兵

二千令前鋒統領丁壽統之率副都統馬爾齊喇錫等以察哈爾喀爾喀兵現駐庫卜克爾者一千三百人往伊克斯淖爾附近駐劄防護阿濟必濟卡倫等處並令王格勒克雅木丕勒公通摩克達什達爾扎等率兵一千協丁壽駐劄令副都統阿三公達福率兵二千駐庫卜克爾以為應援奏入報

聞

平定準噶爾方略前編卷二十